

明代傳記叢刊・名人類④
周駿富輯

熹朝忠節死臣列傳

一卷
(明)吳應箕纂

明文書局印行

wt74/08

熹朝忠節死臣列傳

貴池吳應箕纂

野臣曰初魏忠賢亂政首撻禍杖死者萬
燦也後因汪文言獄逮死者六人楊漣左
光斗魏大中袁化中周朝瑞顧大章後又
因李實誣奏逮死者七人則周起元周順
昌高攀龍李應昇黃尊素并先逮周宗建
繆昌期也以吏部尙書遣戍遇赦爲逆黨
所抑卒死於戍所者趙南星以爭挺擊首

功爲逆黨論劾逮死獄中者王之案各有
傳共十六人他如劉鐸之以詩語譏訕棄
市夏之令以阻撓毛帥逮死蘇繼歐丁乾
學吳裕中張汶英懷賢或縊死怖死仰藥
死杖死皆以逆璫死者也因附名以見
嗚呼自古閹宦之禍烈矣未有如忠賢之
甚者也夫內廷與閹宦角卒不勝故卒死
如振如瑾其觸而死者何累累也外廷與
閹宦角恐不勝而借力於閹則自古至今

於忠賢時爲僅見耳嗚呼不有死者其時
可忍言哉諸臣死十有餘年矣余恐後此
聽聞之言或失其實則死者有知謂當世
何於是條次其本末而爲之傳要之所爲
熹朝者可考而知也卽以使未死者皆有
所感而已崇禎庚辰春王 月

--	--	--	--	--	--	--	--	--	--

太子太保吏部尙書忠毅趙公傳

南星字夢白號儕鶴北直高邑人萬歷甲戌進士其所爲舉子業最有聲爲吏部再蹶再起考功郎綰察剛介爲近代第一以忤執政罷已三十年年七十餘矣光宗登極卽家起工部侍郎天啓初總憲爲冢宰以廷推事忤內罷歸爲逆黨論劾謫戍代州卒死戍所其子壻皆遣戍崇禎初復官廕賜諡予祭葬如例初南星爲選司也疏陳剖露良心極直切所抨擊皆快人心有一給事與左卽引疾

歸平湖陸光祖太宰將去國特起之田間因覆疏
又與新建張相左時冢宰爲餘姚孫鑰有執持所
置司官極一時之選南星爲考功主計一切權勢
無所關其說而臺省長預其事者不使知內閣太
倉相王蘭溪相趙及新建張相盡喪私人其所斥
吏主事卽冢卿甥一給事卽南星姻家也論者謂
國朝二百餘年此考功爲僅見然閣啣之深而臺
省耻不與聞也於是因言者奪冢卿俸外謫南星
又以總憲李世達論救加削籍當是時朝士無不

憤惋而魏允貞顧憲成等數十人共疏爭咸遭放逐後遂有黨人之禍終逆黨時以門戶處者皆由此也天啓癸亥南星總西臺狎主京察去前攷功時已五閱察矣時元趙亂政作去四凶議以堅太宰意所鋤斥畧與癸丑等已爲尙書吏部益振勵以澄清爲己任疏再剖良心蓋與三十年疏相喁答也調鄒維璉攷功用魏大中首垣冒嫌以高攀龍爲總憲皆犯時忌語在諸臣傳中會與南樂相魏廣微失廣微卽允貞子也南星素子蓄之後以

媚忠賢故益示峻一日廣微於廣座詆李三才南
星正色曰李公尊公執友也少年何得輕議前輩
初允貞被斥削三才爲南戶郎獨抗疏救而相以
附時局詆李故南星云然又一日廣微踵門見聞
者以晚拒相發憤怒曰麾我耶然吾官尊未可麾
也恨入骨於是與忠賢謀而嚙之曰不首去南星
吾兩人未知死所南星去餘振落耳未幾以會推
晉撫切責黨比罷南星歸蒲州相韓以疏救亦罷
踰年凡爲南星用者盡斥國遂空逆黨張訥石三

畏等先後誣劾南星起大獄行撫按鞫問承望風旨者辱南星訟庭子清衡甥王鍾龐遭捶楚桁楊於市觀者皆雨泣坐賍一萬五千兩罄產不完十之一也微義助清衡死敲撲矣獻上南星以耄得贖中旨不許戍代州清衡莊浪鍾龐永昌纍纍並發坐短轅攜書一篋自隨南星執甥手仰天祝曰兩人往戍所宜閉門讀書彼蒼不終憤憤也至代州僦小樓居顏曰吉祥掃土室題味蘗齋日夕開卷自娛崇禎初肆赦撫臣牟志夔故留滯不予歸

卒死戍所臨死曰吾可下見楊左諸公矣南星以
舉業著名 十餘年學士誦法不衰皆稱之曰儕
鵠先生後十年而全集始出其古文原本史記饒
有歐蘇風詩於杜工部殆欲近之自萬歷以來凡
以氣節文章著者惟南星稱全云

嗚呼朋黨之說歐陽子比之作備予觀天
啓甲子以後事而信其言之痛切也初高
邑爲攷功錮也以黨爲太宰罷也以黨卒
以黨死戍黨人豈真負國家哉而錮之罷

之死之者何忍奉一刑餘以自殄瘁其國
家也故爲朋黨之說而有後者聖人之言
其不驗歟諸死者皆以黨累趙太宰實始
終之故大臣而受禍烈未有如太宰者也
雖然黨禍無不烈者不烈亦烏在其爲太
宰也

贈太子太保兵部尙書都察院左都御史忠
憲高公傳

攀龍字存之號景逸南直無錫人少從同邑顧憲
成講學知入道之要中萬歷己丑進士出高邑趙
南星門選行人適僉事張世則疏詆朱程請改傳
註攀龍奮然爭癸巳太倉相當國趙南星爲考功
與牴牾有附閣攻部者罷南星時攀龍奉使還卽
上疏爭語侵閣降典史揭陽歸益勵志於學與顧
憲成歛東林書院聚諸同志相切劘後邪黨以門

戶攻東林者卽此也家居三十載天啓元年起爲
光祿丞晉少卿尋轉僕卿時鄒元標馮從吾以總
憲講學數邪臣朱童蒙郭允厚詆之攀龍疏辨又
禮部尙書孫慎行以紅丸事攻方相從哲并會議
三案攀龍力持正論因辨揭大要謂調停隱忍是
君父身上事執大義守法紀君讐必報君賊必討
是臣子身上事時以爲要典三案非斯言不能折
居無何起少司寇甲子入都則楊漣罪璫疏上中
及枚卜事蓋指南樂魏相也魏恚欲與璫合而外